

# INUIT ATAQATIGIIT

## Inatsisartuni



UKA2019/Imm. 55

9. oktober 2019

Stine Egede

**Kalaallit Nunaanni politimesteri nunap ilaani aalajangersimasuni immikkut akuersissuteqartarsinnaannera periarfissaqartillugu nunami maani inunnik angallassissutini biilini assakaasut quaannaveeqqutillit atoqqusaajunnaarnissaat siunertaralugu naalagaaffeqatigiinni oqartussaaffinnut saaffiginequllugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut Ilaasortaq Steen Lyngé, Demokraatit)

Nunarsuatta avannaarpiarsuani ilaanni peqqarniittaqisumi siulersuagut inuuniapiloortarsimaqaat. Pisummik nunarujussuaq angusarsimavaat, aasaappat ukiuppalluunniit apeqqutaatinnagu. Apeqqutaatinnagu quasarnersoq, aputeqarnersoq, imaluunniit aasarissumi nuna angallavigissorsuunersoq. Qimminnguarli aamma iluaqutaalluarsimaqaaq.

Nutaajunerusugut ukiuni qulikkaani arlaqaleqisuni qamutit motorillit pinngitsoorsinnaajunnaariartorpavut. Ilaqutariittut pigalugit, imaluunniit suliffeqarfiit ilaatigut arlalissuanngorlugit, aammalu ilaatigut qamutinik motorilinnik angisuunik oqimaatsunillu atugaqalernikuupput. Allaammi maanna nunaqarfinni, asimilu inuilaarsuarmi najugallit allaat atuisunngorsimapput.

Inuit Ataqatigiinni siunnersuuteqartoq Steen Lyngé, Demokraatit paasilluarparput peqqinnissamut pitsaanngittunik kinguneqartunik pitsanngorsaaniarluni saqqummiussaqaqarneranut. Tunngavilersornermini saqqummiussai paasilluarpagut.

Inuit Ataqatigiinni suliassaq sukumiisumik ataatimiititaliami suliassanngorlugu ingerlakkusupparput. Tassani susassaqtut tusarniaavigalugit qanimut suleqatigilluarlugit suliaq inernejarnissaa kissaatigalugu.

Qamutit motorillit ukiukkut ukiorsiutinik assakaasoqartarunnaarsinnaaneri mianersorfissaqarpoq. Immaqa takorloorneqarsinnaavoq Nuummi amerlasoorsuarni biileqarfiusumi, taamaallunilu aqqusernit ukiuugaluami quasarpallaalertaratik, biilit ingerlaartut amerlasarmata, imaassinnaasoq ukioq kaajallalugu assakaasut, tassalu lameldæk-inik taasagaat atorlugit ingerlaartarnissaq naammassasoq.

Illoqarfippaalussuarnili ukiukkut assakaasut ukiorsiutit pinngitsoorneqarsinnaanngillat. Ukiukkut aqqusineq sermiinnanngorsinnaasarpoq, ullumikkullu assakaasut ukiorsiutit atorneqaraluartut ulorianartorsiortoqartarpoq.

Eqqaanngitsoorusunngilarputtaa q biilit annaassiniutit, soorlu qatserisartut, ambulancet politiillu biilii. Taakuummatami pinartoqartillugu minnerunngitsumik inunnik annaasiniartoqartillugu sukkasuumik, isumannaatsumilli ingerlasariaqartuartartussat.

Aammattaaq inunnik amerlasuunik angallassissutit bussit eqqaamasariaqarput isumannaatsumik ingerlasariaqartussaasut.

Qamutillu oqimaatsut lastbiilit, dumpersit assigisaallu, quasartumi ingerlanerminni ulorianartorsiortitsinnginnissat qulakkeertariaqarpoq.

Inatsisip maanna atuututaaq ersarissaatigineqarnissaa immaqqa pisariaqalersimavoq. Tassami amerlasuut isumaqarput ulloq oktoberip aallaqqaataa aallarnerfigalugu pinngitsooratik ukiorsiutitik assakaasulertussaallutik. Tamanna paatsuuineruvoq. Inuup nammineq nalilissavaa ukiuunerani qaqugukkut, oktoberip ulluisa siulliata kingorna, ukiorsiutitik assakaasulissanerluni. Taamaattorli assakaasut pinngitsoorani kingusinnerpaamik majip aallaqqaataa tikitsinnagu peerneqareersimasussaapput.

Taamaattumik eqqartuilluartoqarnissaa siunnersuut piviusunngussappat pisariaqavippasippoq.

Taama oqaaseqarluta siunnersuut sukumiisumik suliarilluaqqullugu inatsisinut ataatimiitaliamut ingerlateqqipparput.